

RAISONS ET MOYENS

obseruez par M^r le Procureur General
du Roy en la Chambre de Iustice, sur
les Procez verbaux dressez par Mes-
sieurs les Commissaires de ladite
Chambre, sur les Registres de l'Espar-
gne ; Estats de menus de comptant,
Ordonnances, & autres pieces estant
à l'Espargne.

Contre les Tresoriers de l'Espargne.

M. DC. LXIII.



RAISONS ET MOYENS

opposés par M^r le Procureur Général
du Roy en la Chambre de Justice, sur
les Procès verbaux dressés par M^r de
M^r les Commissaires de ladite
Chambre, sur les Registres de l'Espar-
que & l'Etat de menus de comptant,
ordonnances, & autres pièces étant
à l'Esparque.

Contre les Trésoriers de l'Esparque.

M. DC. LXXII.

RAISONS ET MOYENS OBSERVEZ
 par Monsieur le Procureur General du Roy en la
 Chambre de Iustice, sur les Procez verbaux dres-
 sez par Messieurs les Commissaires de ladite
 Chambre sur les Registres de l'Espargne; Estats
 de menus de comptant, Ordonnances, & autres
 pieces estant à l'Espargne.

Contre les Tresoriers de l'Espargne.

LA depredation des Finances a esté si publique & si mon-
 strueuse, & a produit tant d'indignation dans les esprits,
 que hors ceux qui en profitoient, il n'y auoit personne
 qui n'en demandast la condamnation auparauant mesme que
 la recherche en eust esté ordonnée & commencée. Les au-
 teurs n'en estoient point inconnus. La seule fondation de ceux
 qui auoient l'administration des Finances en qualité d'Or-
 donnateurs, ou de Tresoriers de l'Espargne; le titre de leur
 employ & de leurs charges, les rendoit tout au moins coup-
 ables de conuiuence ou de complicité, parce que le desordre
 ne peut iamais arriuer que par les mesmes mains qui deuoient
 conseruer l'ordre, & par l'entremise & le concert de ceux qui
 doiuent estre les Oeconomies & les Dispensateurs fideles du
 Tresor public. Ils ont bien fait dauantage, ils sont deuenus les
 ministres & les instrumens de sa dissipation; & leur opulence,
 leur luxe, la superbe & l'esclat qui est presque inseparable des
 richesses precipitées & des fortunes criminelles, auoient de-
 puis long-temps excité le mescontentement & la plainte de tout
 le monde; mais personne n'a conceu toutes les voyes, les de-
 tours & les souplesses par lesquelles le mal a esté commis, &
 par lesquelles on a trauaillé à le cacher.

On auoit crû d'abord, comme on le deuoit presumer, que
 l'Espargne estant le centre où aboutissent toutes les lignes de
 Finances; Qu'entre les mains des Tresoriers de l'Espargne, &
 par leurs Registres, on trouueroit vne preuue toute claire de la

dissipation des Finances du Roy. Et si leurs Registres auoient esté fidèlement tenus representez, la verité se seroit rencontrée sans peine. Mais la raison pour laquelle on a esté si longtemps sans la descouurir, est que tous ceux qui ont contribué au mal se sont accordez pour en cacher les vestiges, chacun y ayant eu part. Apres en auoir demesslé les artifices, ils sont desormais si clairs & si manifestes, qu'il est impossible d'y trouuer ny d'éuasion ny d'excuse. Et quoy que la fin en soit tres-criminelle, on peut dire; Que les moyens qui ont esté employez pour consommer ce mystere d'iniquité, le sont encore dauantage.

Il y a long-temps qu'il y a du desordre dans l'administration des Finances, mais ils ont extraordinairement augmenté dans les dernières années, où l'on a trouué de nouuelles inuentions de profiter. Il est clairement justifié par les menus de comptant, & par les Registres des Tresoriers de l'Espargne, des années 1656. 1657. & 1658. n'ayans pas voulu représenter encore ceux de 1653. 1654. & 1655. que pour consommer les Finances du Roy, & la substance de l'Estat, & du pauvre peuple qui gémissoit dans la misere, on s'est seruy de diuers artifices, qui jusques à present n'auoient point eu d'exemple.

Le premier a esté de supposer des Traitez de diuerses affaires extraordinaires, pour profiter du contenu aux Ordonnances de remises. Personne n'ignore que dans les derniers temps l'on accordoit d'ordinaire aux Traitans le tiers de remise; de sorte que si le forfait estoit de trois millions, l'on leur remettoit vn million pour les frais du recouurement. Et pour donner au Tresorier de l'Espargne sa descharge, on expedioit vne Ordonnance de comptant de la somme à laquelle montoit ce tiers remis & diminué au Traitant sur le prix de son traité; & moyennant cette Ordonnance, & les payemens ou les promesses que les Tresoriers de l'Espargne ont receu, ils ont donné des billets pour tout le prix du traité. Et au lieu que le traité estant reuoké, tous les billets deuoient estre deschi rez, l'Ordonnance de comptant rapportée & supprimée; & le menu de comptant d'autant deschargé, & qu'on ne deuoit faire estat que de ce qui pouyoit auoir esté actuellement desboursé, on s'est neantmoins seruy de ces billets pour les

faire reassigner sur les meilleurs fonds, & ainsi on a volé des sommes immenses. Le vol est manifeste. C'est vne insigne maluerfation, & vn abus criminel & punissable, d'auoir conuerty en despenſe ce qui n'estoit qu'une simple descharge.

Vn autre artifice a esté de supposer des prests pour profiter des sommes contenuës aux Ordonnances de comptant, expediees pour intereſts. Et au lieu que dans l'ordre & la pratique ordinaire des Finances, il y a des conuictions par lesquelles l'on peut connoistre la verité & la realité d'un prest. 1. L'on en doit voir la destination par vn Arrest du Conseil. 2. L'employ par vne despenſe actuelle. 3. Le principal & les intereſts rembourſez sur vn meſme fond. 4. Et le compte exact de la recepte & de la despenſe dans le registre du Tresorier de l'Eſpargne qui reçoit de l'argent, ou la promesse de celui qui preſte, & qui doit expedier les billets, ſoit pour la conſommation ou pour le rembourſement du prest; lequel par conſequent doit eſtre enregistré.

Pour tenir les affaires dans cette regle, il y a eu pluſieurs reglemens qui ont eſté renouuelez en 1655. portant expreſſes deſenſes au Tresorier de l'Eſpargne de receuoir aucune Ordonnance de comptant pour intereſt de prest, & d'expedier ſes billets, ſi elle n'eſt accompagnée d'un Arrest du Conseil en forme. On a meſpriſé neantmoins toutes ces loix pour viure dans vne extrême confuſion, dont les ſuites ont eſté tres-ſunefteſ. Entr'autres deſordres on en a remarqué deux également hardis: L'un, d'accorder des intereſts & d'expedier des Ordonnances de comptant, pour des prests imaginaires, ſans juſtification de recepte ny de despenſe, ſurquoy il a eſté conſommé, ny de quel fond il a eſté acquité. Ainſi ce ſont de acceſſoires ſans principal, & des accidens ſans ſubſtances. L'autre eſt que les Tresoriers de l'Eſpargne s'entendans avec les Commis du Sur-Intendant, pour faire ou pour mieux dire, pour confondre l'Eſpargne à leur mode, le Sur-Intendant ou ſes Commis retiroient les promeſſes des Fermiers ou des Trairans. Les Tresoriers de l'Eſpargne donnoient leurs billets ou quittances, moyennant qu'on s'obligeoit de leur rapporter leurs deſcharges: ce qui ne ſe faiſoit d'ordinaire qu'apres vne interualle de pluſieurs mois, pendant leſquels ramaffant

toutes sortes de bonnes & mauuaises despenſes, & conſiderant d'autre coſté les fonds qu'on auoit conſommez, on expedioit vne Ordonnance de comptant, pour l'intereſt d'un preſt qu'on ſuppoſoit eſtre de deux ou trois millions; Et pour le mieux pretexter on en libelloit le remboursement ſur les deniers deſia conſommez. Ainſi il falloir de neceſſité aſſigner les intereſts ſur vn autre fond que celui qu'on ſuppoſoit deuoir ſeruir au remboursement du principal, parce qu'il eſtoit entierement eſpuisé. Il eſt conſtant qu'une des marques les plus euidentes de la ſuppoſition d'un preſt, eſt qu'on aſſigne le remboursement du principal ſur vne nature de deniers, & les intereſts ſur vne autre. Et plus encore, quand les Ordonnances ſe trouuent d'abord portées ſur le comptant de l'Eſpargne, & en ſuite changées par diuerſes reaſſignations. Neantmoins cela s'eſt fait avec rant de conſuſion & de deſordre, que ſi en quelques endroits des Regiſtres il eſt fait mention de ces preſts imaginaires, il paroît en meſme temps qu'il n'a point eſté leué ny expedie de billets: ou ſ'il y en a eu d'expediez, ce n'a pas eſté pour la dixieſme partie de ce qui compoſoit le capital du preſt, & meſme la pluſpart de ceux que l'on peut decouurir ſe trouuent reaſſignez ſur d'autres fonds. Que ſ'il y a eu des billets expediez pour partie de ces preſts ſuppoſez, ils ſont libellez dans les Regiſtres pour des despenſes que les Treſoriers de l'Eſpargne diſent auoir eſté fournies à l'Eſpargne, par Delorme, Bernard, Bruant, Gouruille & Pelifſon; & ce ſans en ſpecifier la nature & la qualité, parce qu'on auoit honte de produire & d'auancer en détail tant de mauuaiſes conſommations, pourquoy l'on a recherché avec adreſſe tous les moyens poſſibles d'obſcurcir la verité. Et pour monſtrer plus clair que le jour, la ſuppoſition par laquelle on a fait payer au Roy des intereſts de ſon propre bien pendant pluſieurs années; c'eſt que la deſpenſe entiere de l'Eſtat n'a monté par an qu'environ ſoixante millions. Il ſe trouue qu'on a employé pour environ quinze millions d'Ordonnances de comptant, pour de pretendus intereſts de preſts, qui eſt la plus inſigne maluerſation, & la plus criminelle qui ait iamais eſté pratiquée dans les Finances.

Vne autre voye qui n'eſt pas moins criminelle, mais que l'on

a crû plus facile à executer & à couvrir, est le commerce des billets de l'Espagne, procedans des prests reuoquez, ou d'autres causes semblables, & souuent moins fauorables. On a fait reuiure & valoir ces billets en deux manieres; L'une par remises en les faisant passer successiuelement dans toutes les Espagnes; L'autre en les renouuellant par Ordonnances de comptant & les acheptant à vil prix, comme vne marchandise de rebut, l'on les a fait reassigner sur les meilleurs fonds. Ces billets ont esté ramassez de toutes sortes de personnes; de tous les temps & de toutes les causes. On y a mesme quelquefois interessé des personnes considerables; on leur a fait demander des reformatons de billets pour en autoriser l'usage, & puis on en a traité avec eux avec tant de disproportion qu'il s'est trouué entr'autres, que pour vingr-cinq mille liures on a eu vn billet de neuf cents mille liures, dont on n'a pas laissé de tirer le payement.

La derniere inuention qu'on a pratiquée pour épuiser le fond des Finances a esté dans des alienations d'Aydes, d'Octroys, d'impositions de droits sur les Fermes, ou sur les Tailles; de fermes entieres d'Offices; d'augmentations de gages, de rentes, dans chacune desquelles il se trouue qu'on a consommé la meilleure partie du prix qui en deuoit prouenir par des interpositions & suppositions de noms; par des payemens imaginaires, ou plustost par vn ramas de toutes les maluersations cy-deuant remarquées; c'est à dire en faisant passer pour payement actuel des billets procedans d'Ordonnances de difference de fonds, de remises de Traitez reuoquez, d'interests de prests supposez, ou de vieux billets reformez & reassignez, mesme avec la liberté de changer, falsifier, raturer les noms des personnes, selon que l'on a crû qu'il estoit necessaire pour autoriser le mal, ou pour le couvrir. Par toutes ces voyes il se trouue qu'en trois ans on a vollé au Roy plus de soixante millions.

Il est facile de juger par tout ce discours que le Tresorier de l'Espagne qui void tousiours dans son registre la recepte & la consommation de tous les fonds, a tousiours connu fort clairement si les affaires extraordinaires ou les prests pour lesquels les Ordonnances de remises ou d'interests estoient accordées,

estoyent executées ou non : parce qu'après auoir enregistré sur la premiere expedition, le fond qui en deuoit reuenir au Roy, & ensuite l'Ordonnance de remise ou d'interest, si les Sur-Intendans n'assignoyent aucune despense sur iceluy, ou que ayant assigné ils eussent reassigné sur d'autres fonds, le Tresorier de l'Espargne en biffant sur son registre les premieres assignations, & les changeant suiuant l'ordre des Sur-Intendans, a clairement connu si les affaires extraordinaires, recouremens, ou prests, estoient supposez ou veritables, ou iusques à quel point ils auoient esté executez.

Toutes ces choses bien entendues pour venir au fait dont il est question : Par le Procez verbal du 20. Iuillet 1662. de Messieurs Dormesson, Sainte Helene, Raffelis, Roquesante & le Ferron, Commissaires de la Chambre de Iustice, il se trouue qu'il a esté expédié des billets procedans d'Ordonnances de comptant de dix Traitez reuoquez, pour la somme de deux millions neuf cents cinquante-six mille trois cents liures, sur laquelle il y en a eu pour la somme de sept cents quatre-vingts sept mille liures, qui ont esté reassignez ; le surplus estant encore es mains des Tresoriers de l'Espargne, & autres de leurs intelligences ou Commis de M^r Foucquet, pour les faire reassigner.

Par le Procez verbal du 23. Iuillet 1662. il est justifié qu'en l'année 1659. il a esté expédié pour deux millions deux cents quarante mille six cents vingt-six liures d'Ordonnances de comptant pour des interests de prests supposez.

Par le Procez verbal du premier Aoust 1662. il y a preuue qu'en l'année 1656. l'on a renouvelé & reassigné pour trois millions quatre cents mille liures de vieux billets.

Par le Procez verbal du 9. Aoust 1662. il paroist qu'en 1656. il fut resolu l'alienation des Aydes iusques à deux cents cinquante mille liures de rente, sur le pied du denier dix. De sorte que le prix de cette alienation deuoit estre de deux millions cinq cents mille liures ; mais dans l'execution de cette alienation, il a esté pratiqué vne infinité de fraudes ; & entre autres qu'au lieu de deux cents cinquante mille liures on a aliené des Aydes de valeur de plus de quatre cents mille liures de reuenu annuel, & ce sous de fausses certifications données

données par Girardin & le Noir son Commis, de concert avec Delorme. Et d'ailleurs il est nettement prouvé que le Roy n'a pas profité de neuf cents mille liures sur le prix de cette alienation, qui se trouve consommé en mauuaises dépenses, particulièrement en Ordonnances de comptant pour remises d'un Traité qui n'a point esté fait, ou interests d'un prest supposé, & en billets reformez de toutes les natures cy-dessus expliquées. Ce qui est justifié par ledit Procez verbal.

L'alienation du doublement du droit du Marc-d'or, telle qu'elle a paru aux yeux de la Chambre, & qu'elle est justifiée par le Procez verbal qui en a esté dressé, cy-dessus datté, est encore plus criminelle si l'on en examine toutes les circonstances. Et l'on peut dire qu'il n'a jamais esté fait vne plus grande illusion au public & à la bonté du Roy au commencement de l'année 1656.

Sous pretexte des necessitez pressantes de l'Estat, l'on assembla le Chapitre de l'Ordre, où l'on resolut de doubler le droit du Marc-d'or, de creer de nouueaux Offices, & d'accorder au Roy la Finance qui prouiendroit de la vente des Charges, & de l'alienation du doublement du droit, pour employer aux dépenses de la guerre. Le prix des Charges a esté de neuf cents mille liures, qui ont esté payées, partie à l'Espargne, partie pour le remboursement de l'ancien Tresorier du Marc-d'or. Il ne se justifie point qu'il y ait eu de Traité desdites Charges, mais à l'esgard de l'alienation du doublement dudit droit de Marc-d'or, dont la Finance est d'unze cents mille liures, il a esté payé, sçauoir six cents soixante-six mille six cents soixante-six liures en vne Ordonnance de comptant, sous le nom de Pierre de la Garde pour remise d'un Traité supposé, n'y ayant jamais eu de Traitant : Cent trente-quatre mille liures, pour l'interest d'un prest euidentement supposé, & deux cents soixante & unze mille quatre cents quarante-quatre liures, en un vieux billet de Keruer, acheté à vil prix, pretendu reformé sur la Finance de ladite alienation. De sorte que sur les unze cents mille liures, il ne reste que vingt-sept mille huit cents quatre-vingts dix liures vtilement employées, le surplus ayant esté consommé en mauuaise despense. Les trois quarts de cette alienation ont esté acquis, & appartiennent encore à M^r Fouquet, qui en a joüy jusques à sa détention ; & l'autre quart à l'

Dame de Castelnau, & au sieur de Nouveau, qui pretendent en auoir payé cent cinquante mille liures comptant, & deliuré ladite somme au sieur de Berinken beau-frere du sieur Delorme Commis de M^r Foucquet. Il ne se fera jamais de vol si hardy ny si punissable. Le reuenu de ce droit est de cent trente mille liures de rente, & plus.

Par le Procez verbal du 9. Aoust 1662. il se trouue qu'en l'année 1657. le desordre a non seulement continué, mais augmenté, & qu'il a esté expédié des billets pour des Ordonnances des Traitez non executez, pour la somme de trois millions trois cents mille liures, sur laquelle somme il en a esté reformé pour douze cents mille liures, & le surplus n'a pû encore estre reassigné, mais ils sont demeurez es mains des Tresoriers de l'Espargne, & des Commis du sieur Foucquet, ou leurs preposez; au lieu de les auoir rapportez, & fait descharger l'Estat de menu de comptant, & les certifications de l'Espargne des sommes y contenuës.

Par le Procez verbal du 18. Aoust 1662. il est justifié qu'en ladite année 1657. il a esté expédié des billets pour des Ordonnances de comptant pour prests supposez, jusques à la somme de trois millions quatre cents quatre-vingts vnze mille liures, qui ont tous esté reformez.

Par le Procez verbal dudit jour 23. Aoust audit an, il se trouue qu'il a esté expédié des billets pour des Ordonnances de comptant pour vieux billets validez & renouellez pour la somme de trois millions quatre cents quatre-vingts vnze mille liures.

Par le Procez verbal du 29. Avril 1662. qui contient l'examen du Traité de l'alienation de la moitié des octrois, & par ce qui resulte, tant des Registres de l'Espargne, que des pieces representées par Baron, & de celles trouuées sous le seellé de Bruant, il est justifiée qu'il a esté supposé vn Traité fait d'abord sous le nom de Morisset, auquel depuis Baron fut subrogé sous le nom de Philippes Picart, dont le forfait estoit de deux millions cinq cents mille liures, à la remise du tiers. Ainsi s'il auoit esté veritable, il deuoit estre payé de net à l'Espargne vn million six cents soixante-six mille six cents soixante-six liures. Pour toute la Finance de ladite alienation, il n'a esté fourny que des Ordonnances de comptant pour la remise pour diuers prests supposez, & de vieux billets reassignez, les vns par remises, les autres par

Ordonnance de comptant. Et bien qu'en apparence Baron parust estre le Traitant, dans la verité il ne faisoit que prester son nom à Bruant, auquel il auoit donné vne declaration le nom en blanc; & il est constant que Bruant a esté l'entremetteur de tout ce negoce d'iniquité, & a receu tout ce que le recouurement a produit, qui monte tant en principal que jouïssances, à plus de deux millions cinq cents mille liures.

Le reuenu de la moitié des octroys estoit de trois cents mille liures de rente; & Monsieur Foucquet apres en auoir joüy pendant quelques années, en vendit par plusieurs Contracts, pour enuiron douze cents quarante mille liures. Il en distribua à ses parens & à ses creatures, & se reserua le surplus montant à cent mille liures de rente. Ainsi outre la vilité du prix de cette alienation, le Roy n'en a tiré aucun secours. Il seroit bien mal-aisé d'imaginer vn vol plus manifeste, & vne depredation plus impudente & plus criminelle.

Par le Procez verbal du 26. Octobre 1662. se void la consommation de l'alienation de plus de deux millions de rente faite en 1657. sur les fermes des Gabelles, Entrées, & cinq grosses Fermes, qui deuoient produire plus de quinze millions, si elles auoient esté vendues leur juste valeur, & si le prix en auoit esté mesné; mais au contraire elles se trouuent consommées par des Ordonnances de comptant, de difference de fonds, de remises de traitez non executez, interests de prests supposez, billets reformez, & autres mauuaises despenfes. Cette affaire a esté conduite avec tant de profusion qu'il se trouue par ce Procez verbal, qu'il a esté volé au Roy plus de six millions sur ces sortes d'alienations de rentes.

On auoit en mesme temps crée des Receueurs & Payeurs, auxquels on auoit attribué quarante-cinq mille liures de gages. Les Charges deuoient estre vendues sur le pied du denier dix des gages; mais sous pretexte d'enfler leur Finance, & de la porter au denier dix-huit, on a expédié vne Ordonnance de quatre cents quatre-vingts quinze mille liures de difference de fonds, les billets de laquelle ont seruy; sçauoir, quatre cents cinquante mille liures à faire le fond entier de la Finance des Charges; de sorte que par ce moyen l'on a volé au Roy tout le prix qui en pouuoit prouenir, n'ayant esté fourny aucune autre despenfe

ny descharge au Tresorier de l'Espargne pour deliurer ses quittances au Tresorier des Parties casuelles, que cette seule Ordonnance, faussement qualifiée de difference de fonds, qui ne peut estre appellée de ce nom, puis qu'elle comprend & absorbe le fond tout entier de la Finance desdits Offices; & quarante-cinq mille liures plus auant, qui ont esté reassignées en partie sur d'autres bons fonds.

L'on peut adjouster le Procez verbal du 12. May 1662. de Messieurs Voisin & Pussort, qui contient la consommation d'un Traité fait par M^e François Iacquier, sous le nom de Jean du Buissón, pour plusieurs natures d'affaires; sçavoir l'alienation de deux cents cinquante mille liures d'augmentations de gages aux Compagnies Souueraines; soixante-six mille liures de rente sur les Tailles; vingt-cinq sols du droit de Maubouge; douze deniers des Controolleurs conseruateurs sur les Aydes alienées; augmentation de neuf deniers pour liure aux Payeurs des gages des Compagnies Souueraines. Toutes ces jouïssances doiuent monter à plus de cinq cents cinquante mille liures. Il y auoit encore dans ce Traité le recouurement des six deniers pour liure sur les Tailles: la descharge de la Chambre de Iustice, & vtilité des prests pour les années 1658. & 1659. les deniers des ponts & chaussées de 1659. & les confirmations des hereditez & finances de plusieurs offices de la Chancellerie. Le forfait de ce Traité estoit d'unze millions deux cents mille liures, sur lequel il fut accordé trois millions sept cents trente-trois mille trois cents trente-trois liures six sols huit deniers, pour le tiers de remise, le reste montant sept millions six cents soixante-six mille six cents soixante six liures treize sols quatre deniers, payable en dix payemens qui ne deuoient eschoir qu'au mois de May 1660. Outre cette remise il y a eu pour plus de quatre millions de liures en Ordonnances de comptant pour interets de prests supposez, jouïssances anticipées, difference de finance, & autres pretextes.

Il y a pour plus de deux millions de liures de billets reformez, & qui ont aydé à consommer le prix de ce traité, procedans de remises de l'année 1655. dont il est impossible de justifier la verité par le refus des Tresoriers de l'Espargne de représenter leurs Registres. Il y a vne autre quittance de trois cents soixan-

te-six mille neuf cents quatre-vingts seize liures, de remise du Sieur Jeannin de son exercice 1658. audit Sieur de Guene-gaud 1657. prouenant d'une Ordonnance de comptant de six millions de liures, sous le nom de Duval dont il sera cy-apres parlé. En sorte que d'un recouurement d'unze millions deux cents mille liures, le Roy n'en a pas profité de douze cents mille liures; & outre cette depredation immense, on n'a pas laissé d'y mesnager encore vne fraude tres-criminelle: c'est que les augmentations de gages n'ont esté employées dans les estats que pour trois quartiers, ainsi que les anciens gages des Compagnies souueraines; neantmoins sous ce pretexte l'on a expedie vne Ordonnance de comptant de six cents vingt-cinq mille liures pour la difference de fonds desdites augmentations, depuis le denier sept & demy, jusques au denier dix; & avec cette Ordonnance on a retiré des billets & des descharges sur le net du traité; en sorte que ramassant toutes ces maluer-sations, l'on a diuertie sur ce seul traité plus de neuf millions de liures. Iacquier a depesé auoir payé des sommes tres-considerables à Bruant, & l'a soustenu à la confrontation à M^r Foucquet. Le tout fait sur les quittances des Tresoriers de l'Espargne.

Que s'il est impossible de faire reflexion sur le desordre des années 1656. & 1657. sans en concevoir de l'horreur, soit que l'on en considere la matiere, & les sommes immenses qui ont esté volées au Roy; soit qu'on en examine la forme, & la malice des suppositions & des fraudes par lesquelles on s'y est conduit, il y a beaucoup plus à redire en l'année 1658. dans laquelle se rencontre l'exercice du sieur Jeannin de Castille, avec lequel M^r Foucquet auoit le plus de confiance.

Le premier Procez verbal sur lequel l'on peut faire reflexion, regarde la consommation du Traité fait par Monnerot, sous le nom de Boisel, pour l'alienation de quatre cents mille liures de rente aux gens d'affaires au denier dix-huit. Ce Traité, dont le forfait deuoit estre de sept millions deux cents mille liures, a esté changé, restably par vn autre; & enfin cette somme entierement consommée en Ordonnances de comptant, pour des remises, jouissance, pour renouueller de vieux billets, & pour interests de prests supposez, entre lesquels il y en a quatre sous les noms de le Blanc, Aucillon, Francfort, & du Tot, dont la

supposition a esté clairement justifiée, qui sont employez pour receuoir l'aduanee de ce Traité, montant à quatorze cents quatre-vingts huit mille six cents trente-six liures. Et le sieur Jeannin par son interrogatoire a reconnu qu'il auoit profité d'une partie de cette somme, & déclaré que l'autre auoit esté receuë par M^r Foucquet, auquel il l'a soustenu par sa confrontation. Ce qui paroissoit en quelques endroits des Registres dudit sieur Jeannin, qui ont esté raturez avec tel soin & application qu'il ne se peut plus lire, mais il est constant que cette grande somme de sept millions deux cents mille liures a esté volée au Roy sur les quittances dudit Sieur Jeannin.

Le Procez verbal du 18. May 1662. est pour l'affaire de Duval, dont la maluersation visible & grossiere a esté l'un des principaux sujets de l'emprisonnement du sieur Jeannin de Castille, parce qu'il n'y eut jamais de fraude plus claire & de maluersation moins excusable. C'est une alienation de quatre cents mille liures de rente sur les Tailles, pour l'execution de laquelle on a ordonné que le sieur Jeannin deliureroit sa quittance à Duval, de la somme de six millions de liures, pour la difference du fond jusques au denier dix-huit de ladite constitution, avec le prix veritable, qui ne deuoit estre que de douze cents mille liures. Au lieu d'une quittance ledit sieur Jeannin a expédié trente-six billets de sommes différentes, qu'il dit luy auoir esté demandez par Gourville & Bruant, qu'il cote luy auoir apporté cette Ordonnance. Son Registre porte que partie des billets luy ont esté rendus par Bruant, & qu'il a d'autant déchargé une promesse de douze cents quarante-neuf mille liures, que ledit Bruant luy auoit faite pour auoir des décharges sur le Traité des Commissaires des Tailles; Qu'il en a esté reformé pour seize cents mille liures sur le fond des augmentations de gages; une autre partie sur les alienations des rentes, sur les Gabelles, Entrées, cinq grosses Fermes; & Finances des Offices de Payeurs desdites rentes, & autre partie sur les plus clairs deniers des Receptes, Ferme ou Traitez, & le surplus passé en remise aux Espargnes des autres années, & particulierement au Sieur de Guenegaud sur son exercice 1657. lequel reconnoist qu'il en a esté consommé cinq cents quatre-vingts deux mille liures sur le Traité des hereditiez, cy-dessus énoncé.

Les autres billets ont esté reformez sur d'autres fonds. Il faut obseruer que la meilleure partie de cette mauuaise consommation a esté faite sans Ordonnance de remise; en sorte que l'excuse quoy que ridicule, qui pouuoit estre articulée de ce chef, soit par l'Ordonnateur, ou par le Tresorier de l'Espargne cesse entierement; & la reformation s'estant faite sur les mesmes billets, on ne peut pas dire qu'ils ayent esté supposez au lieu d'autre. On ne peut pas dire non plus que feu Monsieur Seruien y ait participé, parce que le premier billet a esté reformé le 12. May 1659. auquel temps ledit sieur Seruien estoit decédé. Il est à obseruer que l'Ordonnance de comptant a esté falsifiée; ayant esté premierement expédiée sous le nom de Blaise Chirel, endossée & cottée de luy, & depuis changée sous le nom de Duval. Ainsi outre le vol de six millions de liures, il y a vne fausseté notable. Tout cela fait sur les quittances & changemens des Tresoriers de l'Espargne. Pouuoient-ils douter de la verité de ce vol?

Dans le Procez verbal du 12. May 1662. il est fait mention de l'alienation d'un million cinq cents quarante-cinq mille liures d'augmentations de gages alienez aux officiers des Compagnies Souueraines, qui deuoient produire dix millions cinquante-quatre mille cinq cents soixante liures, dont il se trouue que le Roy n'a receu que six cents quinze mille quatre cents soixante dix liures, en laquelle est comprise la somme de cent cinquante six mille liures, pour le prix de deux vaisseaux de Concarneau vendus au Roy, le surplus consommé en mesmes parties de billets reformez, Ordonnances de comptant pour remises de traitez qui n'ont point esté faits, de prests supposez, & pour jouissances anticipées. Ce prodigieux vol a esté fait avec les quittances des Tresoriers de l'Espargne.

Par le Procez verbal du 3. Octobre audit an, 1662. pour la justification des descharges des Tresoriers de l'Espargne, pour la finance de quatre-vingt tant de mille liures de gages accordez aux Colleges des Secretaires du Roy, il est verifié qu'il y a eu vn traité fait au Conseil, avec les Procureurs & Tresoriers des Colleges des Secretaires du Roy, pour payer comptant au Roy, & sans aucune remise ny interests, la finance desdites augmentations, de gages montant à la somme de neuf cents quatre-vingt mille liures. Les

Procureurs du College des Secretaires ont representé aux Commissaires de la Chambre leurs quittances, justifié qu'ils auoient payé les sommes sans aucune remise; neantmoins le Roy n'en ayant rien tiré, les despeses se trouuant à l'Espargne en vne Ordonnance de comptant de deux cents mille liures sous le nom de Pierre Billon pour la pretenduë remise; vne autre pour des interets, & le surplus en vn billet reformé, procedant de l'Ordonnance de comptant de Duval, le Tresorier de l'Espargne a-t'il peu sans crime expedier ses quittances pour de si mauuaisés descharges?

Par le Procez verbal du 23. Octobre audit an, 1662. qui a esté fait pour la consommation du traité des Commissaires des Tailles, ausquels on attribuoit vingt-quatre deniers pour liure sur les impositions, l'alienation estoit de cinq millions de liures de reuenu; & par le traité le Roy ne receuoit aucun secours, parce que les payemens estoient fort esloignez, & les iouissances plus que suffisantes pour les acquitter; & neantmoins la plus grande partie du fond du prouenu de ce traité, qui estoit & sans risque & sans aduance, a esté consommée en billers, & autres semblables denrées que celles cy-dessus.

Par le Procez verbal du 10. Octobre audit an, 1662. il se void qu'il y a eu vn autre million de liures de rente sur les Entrées & cinq grosses Fermes, dont le prix, ensemble la finance des offices de Receueurs & Payeurs, a esté entierement consommé en Ordonnances de comptant, remises de mauuaisés despeses; & entr'autres vn billet de deux cents cinquante mille liures, prouenant de l'affaire des six millions de liures de Duval, duquel on se sert pour payer la finance desdits offices de Payeurs, faisant le principal d'un prest imaginaire, dont on fait payer l'interest comme si c'estoit vne aduance effectiue.

Le Procez verbal du cinquiesme May, 1662. est pour la consommation d'une Ordonnance de comptant de huit cents quarante-deux mille liures, expedée sous le nom de Pierre Roquerol, sous pretexte d'un traité de deux millions quatre cents mille liures, pour le quart en sus de l'equiualant de Languedoc, Controolleurs & Marqueurs des Cuirs. On a joint à ladite Ordonnance vne quittance de Sabatier de pareille somme de huit cents quarante-deux mille liures, à cause de la finance des Receueurs, particuliere

particuliers des Tailles des Paroisses de la Generalité de Caën. Il est constant que Monnerot, Gourville & Bruant, en ont disposé par des billets expediez par ledit sieur Jeannin, & en ont receu plus de sept cents mille liures, comme il est justifié par l'interrogatoire de Dalibert, qui declare auoir vendu les billets procedans de cette Ordonnance. Le tout sur les quittances & billets dudit sieur Jeannin.

Il y a encore deux Procez verbaux, du 5. May, 1662. pour deux Ordonnances de comptant; L'une d'un million cinquante mille liures, sous le nom du sieur du Mesnil; l'autre de neuf cents quatre mille sept cents vingt-neuf liures, sous le nom du sieur Girard, qui sont toutes pour de vieux billets reformez, & depuis reassignez sur les plus clairs deniers de l'Espagne, & enfin par le Procez verbal general il paroist qu'il a esté reformé en plusieurs articles pour plus de dix millions de vieux billets, ce qui est vne profusion exorbitante & monstrueuse; & avec ces billets, & sur les quittances des Tresoriers de l'Espagne, l'on a mal pris, & au prejudice du Roy, toutes ces notables sommes.

Par les deux Procez verbaux des 4. & 8. Iuin 1662 pour deux traitez faits par Gourville; L'un pour le Papier & Biere, L'autre pour les droits de Poisson frais, sec & salé, il se void que ces fermes produisoient plus de quatre cents cinquante mille liures de rente au Roy. Le Papier & Biere a esté aliené pour treize cents dix-sept mille trois cents trente-deux liures. Le Poisson pour dix-huit cents mille liures, dont on a expedie les quittances sous differents noms; & au lieu de payer les sommes à l'Espagne, il a esté expedie sur l'alienation de la ferme du Poisson des Ordonnances de comptant pour plus de seize cents mille liures, sous pretexte de remises, interests & autres mauuaises despenfes, & il n'en est pas entré vtilement au profit du Roy quatre cents mille liures; & neantmoins il est justifié par la deposition du sieur le Coq, qu'il a payé comptant douze cents mille liures; & on a mesme passé jusques à ce point qu'un acquitpatant de cent mille liures accordé à feu Monsieur le Duc de Guise en l'année 1619. pour lequel l'on auoit expedie vne Ordonnance de comptant, libellée sur ladite alienation, qui depuis a esté reformée & reassignée sur le traité fait par Gourville, des

impositions de Bourdeaux & Montauban, & rendu audit sieur Jeannin, sur vne promesse que M^r Foucquet luy auoit faite de luy fournir décharge de seize cents quatre-vingts deux mille liures, à cause des billets & rescriptions que ledit sieur Jeannin luy auoit fournis. On remarque de plus que dans l'alienation de la ferme du Papier, il y auoit vne Ordonnance de comptant de trente-deux mille liures pour l'interest de deux cents soixante-six mille liures, qu'on a falsifiée & augmentée jusques à la somme de cent cinquante mille liures. De sorte qu'en examinant la conduite qui a esté tenue à l'Espargne, il n'y a crime qui ne s'y trouue, & qui n'ait esté pratiqué pour voler le Roy.

Il a esté dressé Procez verbal sur les Registres de l'Espargne des Ordonnances de comptant, qui ont esté expédiées pour des Traitez qui n'ont esté executez, pour deux millions cent mille liures, les billets desquels ont neantmoins esté reformez sur de bons fonds, & payez sur les quittances des Tresoriers de l'Espargne.

Il a esté dressé le Procez verbal du 20. Nouembre audit an, 1662. des Ordonnances de comptant, pour interests de prests supposez. Il y en a cinq millions cent trente mille liures, dont les billets ont pareillement esté reformez & reassignez, & les sommes payées sur les quittances des Tresoriers de l'Espargne.

Et le dernier Procez verbal, qui est du 15. Iuin 1662. contient la verification de la despense faite par M^r Pierre Monnerot, sous le nom du sieur Guyard, pour l'alienation de six cents trente-cinq mille liures de rente sur les Parties Casuelles, & six mille cinq cents liures pour les Receueurs, dont il deuoit prouenir sept millions de liures, & se trouue qu'il n'en a pas trouuée la dixiesme partie au profit du Roy.

Toutes lesquelles parties, sans compter ce qui peut estre de 1653. 1654. & 1655. 1659. & 1660. seroient assez immenses, quand elles seroient considerées separément; mais les ramassant toutes ensemble, qui est-ce qui peut considerer, sans la derniere indignation, que les principaux Officiers du Roy, qui sont obligez de veiller à la conseruation de ses Finances, ayent eu la hardiesse de prendre sur sa confiance, sur la necessité de son Estat, & sur les miseres de son Peuple, des sommes si monstrueuses?

Il a esté encore fait en l'année 1659. plusieurs autres alienations de gages, rentes & droits; entr'autre vne de douze cents mille liures de rente sur les Tailles, sous le nom de Robert Vincent, sous pretexte de laquelle on a expedié vne Ordonnance de treize cents trente-trois mille liures. On a inuenté vn prest sous le nom dudit Vincent, pour les interets duquel on a expedié vne Ordonnance de comptant de cinq cents cinquante mille liures; vne autre de six cents mille liures, sous pretexte de la jouissance d'vne année: D'vne de difference de fonds, de dix huit millions de liures. Il y a eu des billets reformez prouenans de mauuais despenfes pour plus de cinq cents mille liures: & ainsi du principal de cette constitution, qui deuoit estre de vingt & vn millions six cents mille liures, il n'en a esté payé vtilement que six cents dix-sept mille liures. Cependant il est justifié que de ces rentes on en a baillé aux principaux Officiers de la Maison du Roy, du Conseil, des Compagnies Souueraines, pour leurs gages, appointemens & pensions, jusques à la somme de six millions de liures, que l'on a pris sur les plus clairs deniers de l'Espagne, sur lesquels ces parties ont esté reassignées.

Si l'on auoit eu le temps de verifiser toutes les mauuais despenfes fournies à l'Espagne pendant ladite année 1659. & celle de 1660. il s'en seroit trouué autant qu'il s'en trouue es années 1656. 1657. & 1658. Il y en a bien dauantage es années 1654. & 1655. mais les Tresoriers de l'Espagne, pour oster la connoissance de si prodigieuses dissipations, supposent, contre toute apparence de verité, qu'ils ont bruslé les Registres des billets desdites années, ce qui ne peut entrer dans la pensée de qui que ce soit: & la malice affectée avec laquelle ils s'opiniastrent à cacher lesdits Registres, est vn crime punissable, & vne preuue conuainquante qu'ils ont fait, ou du moins eu part à tant de vols qui ont esté faits sur leurs seules quittances.

Il se trouue qu'en la seule année 1656. il y a des quittances de remises expediées au sieur de la Baziniere par les sieurs de Guenegaud & Icannin de Castille, pour la somme de quarante-deux millions sept cents cinquante-cinq mille trois cents liures six sols quatre deniers; & cependant ils veulent estre quittes & deschargez de rendre compte de ces mon-

strueuses sommes, en disant qu'ils ont brulé leurs Registres.

On ne peut pas douter que de cette depredation extraordinaire & incroyable l'Ordonnateur soit le plus coupable, puis que son honneur & sa conscience, & le depost sacré que le Roy auoit mis entre ses mains de l'administration des finances, l'obligeoit à y veiller religieusement, & empescher les moindres profusions; & la pretention de n'estre point comptable (porte son exception perpetuelle) s'il n'y a du delict & de la maluersation: car en ce cas, & s'il s'en trouue, plus la dignité est releuée & la confiance excessiue, plus on est criminel d'y auoir manqué.

Mais à l'égard des Tresoriers de l'Espagne, il est impossible de pretendre qu'ils soient exempts non seulement de faute, mais de crime, si on considere trois choses.

La premiere, *Quel* est leur deuoir & leur fonction.

La seconde, *Que* s'ils s'en estoient fidelement acquitez il seroit impossible qu'il eust esté commis aucun desordre.

La troisieme, est la qualité de leur faute dans laquelle il est impossible de douter qu'ils n'ayent volontairement peché, mesme par interest & pour en profiter.

Pour ce qui est du premier point, si l'on rapportoit ce qui a esté pratiqué par les Tresoriers de l'Espagne aux Ordonnances qui sont faites, pour l'administration des finances, & la fonction de leurs charges, il ne faudroit point d'autres preuues pour leur faire leur procez, puis qu'ils aduoient tellement qu'ils n'ont pas obserué ces loix, qu'ils pretendent mesmes qu'elles leur sont inconnuës. Mais sans remonter plus haut, par l'Ordonnance de François I. de l'an 1523. article 8. portant, *Des Registres de l'Espagne*; Il les oblige d'en tenir deux; l'un pour la recepte, l'autre pour la despense; & l'un & l'autre deuoient estre percez d'un cordon, scellez du grand Seau; signez en chaque feuille d'un Secretaire des Finances. Toutes les receptes & despenses signées; & le Tresorier obligé outre cela, de faire rapport tous les huit jours de son manient & de son administration; mais quelques sages que fussent ses precautions, n'ayant pas entiere-ment preueu tous les desordres, le Roy Henry II. par vne nouuelle preuoyance, & pour oster aux comptables le moyen d'abuser des deniers publics, ordonna que l'Espagne seroit

faire dans le Louure; Que toutes les quittances, mandemens & rescriptions, & jusques aux bordereaux des especes, seroient non seulement escrites dans les Registres, mais controollées. Bien que ces loix soient anciennes, elles n'en sont ny moins justes ny moins obligatoires, n'ayant jamais esté abrogées par aucun Reglement contraire. Et s'il y a quelque vnes de ces formalitez extérieures qui ne soient plus en vſage, il est certain que l'obligation de tenir des Registres exacts & fideles, & d'y inserer tant la recepte que la despenſe, est vn deuoir indispensable à l'égard d'un Comptable. Quand il n'y auroit point de loy écrite, il y seroit engagé par le seul titre de sa charge; & l'Ordonnance estant en cela conforme à la raison & à l'équité naturelle, il n'y a point d'apparence que les Tresoriers de l'Espargne puissent pretendre auoir prescript contre vne loy si sainte.

Mais pour s'arrester à quelque chose de plus recent, peuuent-ils ignorer l'Ordonnance du deffunt Roy, de l'année 1629. faite peu de temps apres la Chambre de Iustice de 1624. laquelle en l'article 139. porte defences aux Tresoriers de l'Espargne de bailler aucunes promesses, recepissez, billets ou rescriptions, à peine de nullité, & receuoir aucuns deniers qu'en vertu de quittances ou mandemens controollez, si ce n'est en vertu d'Arrest du Conseil, à peine de peculat? S'ils peuuent dire que cette Ordonnance, qui n'a jamais esté reuokée, n'a pas esté obseruée exactement; Que l'autorité des Sur-Intendans a esté plus estendue & plus absoluë dans les derniers temps, ce qui n'est pas veritable, puis qu'il y a Arrest de l'année 1655. qui defend aux Tresoriers de l'Espargne d'expedier des billets pour des Ordonnances de comptant, pour remises de Traitez ou intereſts, sinon en rapportant les expeditions des Traitez & des actes de caution, & les Arrests de prests en bonne forme, signez des Secretaires du Conseil, à peine de peculat, & d'en respondre en leurs priuez noms. Tousjours faudra-t'il qu'ils demeurent d'accord que rien ne les peut dispenser des principes de la Iustice naturelle, de la fidelité que des Officiers & des domestiques doiuent à leur maistre, qui doit estre beaucoup plus grande enuers le Prince, à qui on doit tout, & de la part des personnes constituées en des emplois si releuez, & des fonctions si importantes, où rencontrans le comble de l'honneur & de

la fortune, s'ils tombent dans l'infidélité, que la misere mesme ne rendroit pas excusable, il semble qu'il n'y ait point de peine assez feuerre pour expier leur crime.

Donc il faut demeurer d'accord que la premiere obligation des Tresoriers de l'Espagne, est de faire bonne recepte.

La seconde, de ne faire que de bonnes despeses.

Et la troisieme, qui les enferme toutes deux, est de retenir des registres fideles de l'un & de l'autre, qui soient les comptes & les justifications perpetuelles de leur administration. C'est l'obligation naturelle de tous ceux qui recoivent le bien d'autrui, voire mesme pour les moindres administrations. A combien plus forte raison pour de si grandes sommes, pour vne administration si importante, & vn patrimoine si sacré?

Surquoy l'on peut faire cette obseruation que les Tresoriers de l'Espagne ont esté tres-exacts à ne point recevoir aucune despesse comptable, sans auoir leur descharge; c'est à dire l'Ordonnance du Conseil, & la quittance de la partie prenante, parce qu'ils ont apprehendé, que s'ils manquoient à l'obseruation des termes, ce qu'ils auroient mal payé ne leur fust rayé dans la despesse de leur compte. Il n'y a point eu d'autorité assez forte pour les obliger de rien faire contre leurs interets, & de se mettre dans le peril d'une radiation. N'ont-ils pas deu apporter la mesme vigilance, & vne pareille exactitude pour la conseruation des interets du Roy? & neantmoins ils ont preuariqué laschement, en receuant indistinctement toutes sortes de mauuaises despeses. Il ne suffit pas de dire qu'ils ont les ordres de leurs Superieurs; si ces ordres ne sont innocens & legitimes. Ils ont l'entrée de la Chambre du Roy tous les jours; Ils ont droit d'approcher de sa sacrée personne. Ils sont Iuges & ont entrée dans ses Conseils, pour se plaindre, s'il leur estoit fait quelque violence.

Si les Tresoriers de l'Espagne y auoient procedé, non seulement dans vne diligence exacte, mais dans la foy la plus commune, il estoit impossible qu'il y eust eu aucun desordre, car l'obligation de faire bonne recepte, emporte vn soin religieux de ne rien obmettre de ce qui a esté receu, de ne bailler ny quittances ny billets, qu'ils ne recoivent de l'argent comptant, & de s'en charger fidellement pour en faire recepte. Et supposé

que contre l'ordre ancien, veritable & naturel, ils ayent peu estre obligez pour quelque cause que ce soit, de bailler des billets & des rescriptions qui les chargeoient comme d'argent comptant; ils ont deu auoir le mesme soin & la mesme exactitude pour deliurer des billets qu'ils auroient pour compter de l'argent, s'il auoit esté entre leurs mains, puisque le porteur de leur billet le reçoit du Fermier ou du Traitant, auquel leur acquit sert d'une entiere décharge. Ainsi ils n'ont point deu expedier aucun billet, sans connoistre & les personnes & la cause pour laquelle ils les expedioient, & sans en faire mention dans leur registre, afin de rendre compte au Roy de leur administration, & que sa Majesté peust connoistre si l'on n'auoit point diuertie les deniers de son Espargne, & à quel vsage ils estoient employez.

Pour la despense ils ont deu estre encore plus exacts de n'en point receuoir qui ne peussent passer; parce que quand ils comptent à la Chambre, les radiations se font sur eux des mauuaises despenses qu'ils auroient receuës. Ils n'en ont point deu, & n'en doiuent jamais receuoir qu'ils n'en connoissent la bonté, qu'ils ne sçachent sur qui ils ont recours, ou qu'ils n'ayent leur descharge toute entiere par les ordres innocens & legitimes du Conseil, qui seul a eu le pouuoir de les donner.

Car pour preuenir le plus grand pretexte par lequel les Tresoriers de l'Espargne se pretendent excuser, la seule couleur de toutes ces maluerfations, & la source du desordre, est que nos Roys ayant accoustumé depuis quelques années de faire passer sur des Ordonnances de comptant, des despenses qu'ils ne vouloient point publier par des raisons d'Estat: Au lieu que ces Ordonnances de comptant n'estoient que pour les affaires secretes & principales, on s'est imaginé qu'on s'en pouuoit seruir pour couvrir indifferemment toutes sortes de fraudes & de depredations, & l'on a affecté le mesme secret pour les affaires de Finance, telles que sont les Traitez, les prests, & les alienations de rentes; & plus ce commerce a esté prejudiciable au public, & contraire à la Iustice, plus l'on a recherché les tenebres & la confusion. Et il ne faut point d'autre preuue pour faire le procez aux Tresoriers de l'Espargne, & aux Ordonnateurs, que la comparaison de ce qui s'est pratiqué à l'Espargne en 1646. avec le desordre & la confusion des dernieres années;

estant justifié qu'il n'y a pas vne Ordonnance de comptant, qui ne soit accompagnée ou du Traité ou de l'Arrest de prest, & en vn mot de tout ce qui est prescrit par les anciens reglemens, & encore renouvelé par celuy de 1655. Cependant ce sont les mesmes Tresoriers de l'Espargne, & ainsi s'ils ont changé d'administration, ce n'a esté que pour en profiter.

Si les Tresoriers de l'Espargne en eussent vſé comme ils estoient obligez, par le deuoir de leurs charges & la fidelité qu'ils doiuent au Roy, le moindre refus pouuoit empescher ce desordre. Ils n'auoient qu'à viure comme ils auoient vescu auparavant; ne se point charger de sommes qu'ils ne receuoient pas, ou dans la derniere extremité, en tenir bon & fidele registre; faire signer sur leur registre leur décharge, par ceux à qui ils bailloient des billets qui les chargeoient, & n'en deliurer qu'à des personnes conuës; ce que la moindre personne & la plus rustique ne manqueroit pas de pratiquer, non seulement par honneur & par fidelité, mais par son interest propre; pour ne pas demeurer chargé des sommes les plus mediocres dont il auroit baillé quittance, comme s'il les auoit actuellement receuës.

Mais tant s'en faut que les Tresoriers de l'Espargne ayent rien conserué de cét ordre, de ce soin & de cette bonne foy, & pour le Roy & pour eux-mesmes; qu'au contraire il n'y eût jamais rien de plus surprenant que le desordre, & la confusion dans laquelle ils ont affecté de tomber. Car ils pretendent n'auoir point conserué le registre de tous les billets qu'ils ont donnez pour ces Ordonnances de comptant, de difference de fonds, de Traitez reuoquez, d'alienations, de prests & interests d'iceux, & de toutes les reassignations qui ont esté faites de billets renouvellez & reformez des années dont ils ont compté à la Chambre des Comptes. Et sous pretexte qu'ils disent qu'il y a vn Arrest du Conseil qui a ordonné qu'on brusleroit les menus de comptant par des raisons d'Estat, ils supposent qu'ils ont bruslé tous les Registres des billets. Il faut en verité qu'il y eust bien du mal dans tous ces Registres, puisque dans la crainte de les représenter, & supposant de les auoir bruslez, ils se veulent bien charger de la reticence la plus frauduleuse & la plus criminelle qu'un domestique puisse jamais commettre enuers son Maistre, vn sujet & vn officier enuers son Prince, dans le dessein de luy cacher la pluspart des fraudes qui luy ont esté faites.

Et

Et quand il n'y auroit que cette raison seule, elle suffiroit pour rendre les Tresoriers de l'Espargne responsables de toutes les maluersations, desquelles ils se rendoient complices & receleurs dans la fin, quand ils n'en auroient point esté coupables dans le commencement. Les domestiques enuers les particuliers; les Officiers enuers le Prince ne sont pas seulement obligez à auoir les mains innocentes, à ne point commettre de larcins; mais comme la fortune de leurs Maistres est commise entre leurs mains, s'ils ouurent la porte aux voleurs pour entrer, ou pour sortir, ils se rendent complices & receleurs du larcin, & punissables autant & plus que celuy qui l'a commis. Or les Tresoriers de l'Espargne demeurans d'accord, comme ils n'en peuuent disconuenir, que quand ils ont deliuré leurs billets pour toutes les mauuaises parties, dont la repetition seroit ennuyeuse, ils en ont fait & gardé registre, par lequel on pouuoit connoistre tout l'abus qui y auoit esté commis: Dés l'heure qu'ils supposent les auoir bruslez, ils se chargent d'auoir volé au Roy le seul repertoire d'une administration dont ils estoient depositaires; & cette incendie ne seroit pas moins punissable, & est bien plus importante que celuy qui auroit esté mis dans vne maison, dans vn tresor où seroient des titres qu'il auroit bruslez. Car enfin c'est auouer qu'ils sont incendiaires de ce dont ils ont esté depositaires.

C'est pourquoy quand les maluersations qui se sont rencontrées dans ces billets seroient de telle nature que les Tresoriers de l'Espargne en les baillant n'en eussent pu reconnoistre la faute, rien ne les pouuoit dispenser d'en conseruer la preuue par leurs Registres. Car mesme puis qu'ils sont obligez de tenir Registre de recepte & de despense, comme on n'en peut pas douter, le Registre des billets estoit à cet égard le veritable Registre, qui contenoit la recepte & la despense, outre que le Registre du Comptable, appartenant au Maistre, ils sont perpetuellement obligez de le luy représenter; & ne le faisant point, on leur peut soustenir qu'ils sont responsables de toutes les sommes, dont ils ont baillé les billets, puis que n'en pouuans rendre raison ils doiuent estre confiderez comme en ayant fait vne recepte actuelle. Et si les Tresoriers de l'Espargne pretendent que l'Ordonnance ne parle point de Registre des

billets : mais de celuy des quittances, il est vray ; mais l'Ordonnance leur defendant d'expedier des billets, elle n'a garde de leur ordonner d'en tenir Registre, ny de les garder. Que s'ils ont pû se dispenser de l'Ordonnance & expedier des billets, ils ont deu en mesme temps en tenir Registre & le conseruer. Mais ce qui leue toute la difficulté, est que l'Ordonnance les oblige de tenir deux Registres, l'un de recepte, l'autre de despenſe. Posé que le Registre de recepte soit, comme ils l'articulent, celuy des quittances, ils doiuent auoir vn Registre de despenſe qu'ils sont obligez de garder pour le représenter au Roy toutes fois & quantes qu'il plaist à sa Majesté. Or ils ne monstrent aucun Registre particulier de despenſe, qui pourtant seroit le plus essentiel, pour voir de quelle sorte les deniers publics ont esté consommés, & ils ne scauroient se parer de cette obmission, qu'en disant que le Registre des billets contient la recepte & la despenſe, mais qu'il est brulé.

Et tant s'en faut que l'on puisse prendre auantage de ce que l'on pretend qu'il a esté ordonné que l'on brusleroit les menus de comptant, qu'au contraire c'est ce qui rend la liberté qu'on suppose auoir prise de brusler les Registres des billets, plus criminelle & plus punissable. Car quoy qu'anciennement les Comptans fussent les Secrets de l'Estat, qui ne deuoient jamais estre diuulgez, il a fallu pourtant vn Arrest pour auoir la liberté de les brusler; Autrement les Tresoriers de l'Espagne eussent esté obligez de les garder, & eussent esté coupables s'ils les eussent bruslez ; & on ne peut pas entendre cette permission extraordinaire, & qui a sa cause particuliere aux billets, où la raison non seulement n'est point égale, mais elle y est contraire ; car autant qu'il faut que les vns soient cachez, autant faut-il que les autres soient perpetuellement connus. Et c'est contre toute sorte de raison, & contre tout l'ordre des Finances, qu'on a pratiqué cette mauuaise forme de cacher la verité par des billets, qui en effet ne peuuent auoir d'autre fin que de couvrir ce qui peut estre vicieux. Car ce seroit adiouster mensonge sur mensonge, fraude sur fraude, fiction à fiction, de vouloir estendre ce qui a esté dit pour les menus de comptant, dont le secret est utile, à des billets abusifs, & cause de tout le desordre, dont la suppression ne pourroit estre desirée, que pour en asseurer l'im-

punité. Et à toute extremité, ce que l'on pourroit pretendre, ce seroit d'auoir eu la liberté de brusler les Registres des mesmes années dont les menus de comptant ont esté bruslez. Mais depuis l'année 1639. les menus de comptant, & les Ordonnances ayant esté soigneusement conseruez par ordre du Roy, parce que l'on connut le mal & le prejudice qu'auoit apporté cette suppression des menus de comptant, il est sans doute que les Tresoriers de l'Espagne ont deu aussi garder leur Registre, & qu'il n'y a ny raison ny pretexte par lequel ils se puissent dispenser de les représenter.

Mais il n'est pas mal-aisé de connoistre pourquoy les Tresoriers de l'Espagne refusent de représenter leurs Registres; & si l'on veut penetrer le motif de cette coutumace affectée, c'est en vn mot que par la lecture & l'examen des Registres des cinq dernieres années qu'ils n'ont pas pû cacher, parce qu'ils s'en seruoient chaque jour, estant conuaincus d'une infinité de malversations criminelles & punissables; ils ont reconnu que par la conference des Registres des années precedentes, le mal paroistroit à découuert, & que ce mystere d'iniquité seroit entierement déuouillé, la pluspart des mauuaises consommations procédant de remises des Espagnes precedentes l'année 1656. dont on ne peut auoir vn entier esclarcissement, si les Registres de 1654. & 1655. ne sont rapportez, dans lesquels l'on trouueroit la verité des vols qui ont esté faits au Roy de la somme de dix-sept millions sept cents cinquante-cinq mille trois cents liures six sols quatre deniers pour le moins, pour laquelle il se trouue des quittances de remises desdites années en 1656.

Mais pour connoistre plus clairement dequoy les Tresoriers de l'Espagne sont coupables, & quel est le crime qui leur est imputé, il faut considerer qu'estant les depositaires du tresor public, toute la recepte & toute la despenſe des Receneurs de l'Estat, se faisant par leur ministère & sur leur quittance; il n'a point esté commis de maluersation de laquelle ils ne soient coupables, ou d'ailleurs complices & responsables, parce qu'il n'en a point esté commis que sur leurs quittances, & sur leurs signatures, & qu'ils ont deu par vn deuoir legitime & indispensable, veiller soigneusement pour la conseruation des interets du Roy, & regarder exactement à qui & pourquoy ils donnoient

leurs quittances, si c'estoit des personnes & porteurs d'une bonne despenſe.

Le vol qui a eſté fait au Roy eſt certain & public; il vient d'eſtre expliqué par le détail. Le vol n'a pas eſté fait par eſfraction dans les Bureaux des Receptes ou des Fermes; Tous les Fermiers, tous les Receueurs & tous les Traitans ont porté leur argent à l'Eſpargne, au moins ont-ils des quittances & des billets du Treſorier de l'Eſpargne, qui auoué auoir receu ce qu'ils deuoient au Roy. C'eſt donc à l'Eſpargne, entre les mains & par les mains du Treſorier, que les deniers ont eſté diuertis, c'eſt à luy à reſpondre de ce diuertiffement.

Paſſons plus auant, & voyons quelles ont eſté les voyes par leſquelles ces maluerſations ont eſté commiſes, afin de juger plus ſeulement, ſi les Treſoriers de l'Eſpargne ſont innocents, *comme ils le pretendent*. Il eſt certain que le moyen vnique par lequel l'on eſt paruenu à cette diſſipation exceſſiue, a eſté de ſuppoſer de fauſſes despenſes; ce qui s'eſt fait d'ordinaire, en reaſſignant de mauuais billets, & tout cela eſt le crime du Treſorier de l'Eſpargne, autant que celui de l'Ordonnateur. Car, par exemple, quand on a ſuppoſé vn preſt, ny l'Arreſt de preſt en forme, ny la ſomme preſtée, ny les promeſſes d'un homme ſoluable, qui s'obligeaſt de payer aux termes conuenus, n'ont point eſté portez à l'Eſpargne, & le Treſorier de l'Eſpargne qui n'a pû ignorer à quoy il eſtoit obligé par les anciens reglemens, renouellez en 1655. & qui a veu que c'eſtoit vne fourbe & vne ſuppoſition, n'a point deu recevoir l'Ordonnance de comptant pour l'intereſt d'un preſt euidentement ſuppoſé, ny expedier ces billets à des perſonnes inconnues. Cependant il l'a fait, & c'eſt ſon crime. Car bien loin de concourir comme il a fait à cette maluerſation, il a deu s'éleuer & en faire plainte & au Conſeil & à la perſonne du Roy. Il a tousiours eſté en eſtat de cela.

Mais dans la reformation des billets le crime eſt encore plus grand. Premièrement, c'eſt vne faute d'auoir expedié des billets contre la deſenſe & la diſpoſition preſiſe de l'Ordonnance de 1629. qui n'auoit deſendu d'uſer des billets que parce que le ſage Legiſlateur qui l'auoit compoſée en auoit preueu l'abus & le mauuais uſage. En eſſet, ſi l'on ne s'eſtoit ſeruy dans l'adminiſtration des Finances que de quittances controullées, il

auroit esté impossible d'en abuser au prejudice du Roy, par des reformatiōs. Et quoy qu'un usage contraire semble excuser les Tresoriers de l'Espargne, & diminuër la faute qu'ils ont commise, en expediant des billets; il est certain pourtant que si pour la facilité de leur exercice ils se sont donnez la liberté de contreuenir à la loy, ils se sont chargez en mesme temps de tout l'euenement. Et si l'expedition des billets a produit des abus & des desordres, ils en demeurent responsables, & se sont chargez des vols qui ont esté faits par cette voye.

La deuxiesme consideration beaucoup plus puissante, c'est que par l'Ordonnance de Charles IX. il est defendu aux Tresoriers de l'Espargne de changer aucune assignation sans un ordre precis du Conseil; & cet ordre doit estre par escrit, & reuestu des mesmes formalitez, que les premieres assignations. Ainsi un Tresorier de l'Espargne qui ayant expedie son billet ou sa quittance sur vne nature de deniers, la change sur vne autre nature de son autorité priuée, il est assurément coupable. Aussi les Tresoriers de l'Espargne ne pretendront pas que l'abus & la corruption du siecle leur ayent attribué cette autorité.

Disons plus, Que les despeses de l'Estat sont de deux sortes; les vnes comptables, qui sont comprises dans les Roolles ordinaires, & dont on compte en la Chambre; les autres par Ordonnances de comptant que l'on ramasse tous les trois mois, & dont on compose un estat, sur lequel on expedie vne certification de comptant, qu'on enuoye en la Chambre, sans qu'elle ait connoissance du détail des parties qui y sont comprises. A l'égard des despeses comptables, l'usage veut qu'elles puissent estre assignées par le Sur-Intendant; de sorte que quand il en faut changer l'assignation, ce changement peut estre fait par luy seul. Mais pour les Ordonnances de comptant, elles sont nulles, & ne peuuent seruir de décharges au Tresorier de l'Espargne, si elles ne sont signées de M^r le Chancelier; & au bas de chaque Ordonnance on met le fond sur lequel elles doivent estre assignées. Que si l'on veut changer ce fond, & en mettre un autre, soit sur l'Ordonnance ou sur les billets qui en prouiennent, ce changement d'Ordonnance plus important que l'Ordonnance, n'a pû ny deu estre fait que par la participation & de l'autorité de tout le Conseil, & de toutes les personnes qui

auoient originairement signé l'Ordonnance de comptant. Si l'on en vse autrement, c'est vn abus & vne maluersation punissable. Cependant tous les Tresoriers de l'Espagne demeureront d'accord que les ordres qui leur ont esté donnez de reassigner des billets, qu'ils auoient expediez au lieu des Ordonnances de comptant, ne sont point signez de Monsieur le Chancelier, & ne l'ont point esté. Pour monstrier combien il estoit necessaire d'observer cette precaution, & quel est le prejudice que le Roy a souffert pour s'en estre dispensé, l'expedition d'une Ordonnance de comptant, pour la remise d'un Traité dont le payement estoit assigné sur le Traité mesme, estoit vne chose entierement innocente. Mais ce qui a fait le crime, c'est que ce qui ne deuoit seruir que pour vne décharge au Traitant; cette Ordonnance, qui deuoit demeurer nulle par le moyen de la reuocation du Traité, on s'en est seruy comme d'une bonne despenſe, & ce par la reassignation du billet, ce qui n'auroit jamais esté fait si les choses auoient esté proposées au Conseil, parce que Monsieur le Chancelier n'auroit point autorisé par sa signature vn commerce si infame, & vn brigandage si criminel. Il en est de mesme des vieux billets de l'Espagne, renouellez par Ordonnances de comptant, qui portent toutes sur le fond mentionné en l'Ordonnance. Car de faire reuiure des billets, & les renoueller pour leur donner cours, & de les assigner sur des fonds des années precedentes entierement consommez, ce ne seroit pas faire grand prejudice au seruice du Roy si les choses estoient demeurées en cet estat, & si l'on n'auoit pas eu de dessein caché. Mais ce qui fait le mal, & le desordre, c'est qu'on s'est seruy de ces billets pour consommer les plus clairs deniers des Traitez des Fermes & des Receptes des années courantes. Ces maximes vne fois establies, il n'est pas mal-aisé d'en tirer des consequences. Car s'il est vray que les Tresoriers de l'Espagne ne peuuent changer aucune assignation de leur chef, & sans vn ordre par escrit; si ces ordres de reassignation doiuent estre signez de tout le Conseil, quand il s'agit de despenſe faite par Ordonnance de comptant, & si lors qu'ils ont veu qu'on abusoit de ces reassignations pour voler des sommes immenses, ils ont deu s'y opposer, & n'y pas contribuer de leur ministere, il est euident qu'ils ont peché en toutes les manieres, n'ayant rien fait de ce qui leur estoit prescrit, & ayant fait tout ce qui leur estoit defendu.

Premierement, les Tresoriers de l'Espagne confessent qu'ils ont diuerfes fois reassigné des billets, & qu'estans assignez sur vne certaine nature de deniers, ils les ont changez sur vne autre. Cependant ils n'apportent aucun ordre, ny du Conseil entier, ny des Sur-Intendans, & ils pretendent en estre quittes en disant qu'ils les ont bruslez. Mais n'est-ce pas vne pure illusion de dire qu'un comptable & un Tresorier de l'Espagne n'ait pas conserué tout ce qui pouuoit estre pour sa décharge & pour sa justification?

Quand on impute au Tresorier de l'Espagne, d'auoir renouvelé des billets procedant d'Ordonnances de comptant, de traitez non executez, de prests supposez, de vieux billets renouvellez, & d'une difference de fond, ils disent qu'ils ont esté forcez par l'autorité du Sur-Intendant, auquel ils ne pouuoient desobeir sans perir. Quand on les presse & qu'on leur represente que le vol & le pillage ne leur a pas esté inconnu, & que lors qu'ils ont changé ces billets de nature, ils ont connu leur origine vicieuse en les deschargeant sur leurs registres, ainsi qu'ils n'ont peu ny deu en honneur & conscience autoriser cet abus par leur signature; Ils disent pour toutes defenses qu'ils ont eu des ordres de leur Superieur, duquel il ne leur appartient pas de controuler la conduite. Et quand on leur demande la representation de ces ordres, ils respondent qu'ils les ont bruslez.

Quel desordre! Quel auenglement! Un Tresorier de l'Espagne oubliant tous les deuoirs d'un sujet enuers son Souuerain, & d'un Officier enuers son Maistre, s'engage dans la complicité de tant de crimes! Les Tresoriers de l'Espagne disent qu'ils sont violencez à les commettre. Si on les en veut croire, la crainte de leur exil les engage à leur precipice. Celuy qui leur commande de mal faire, & qui les contraint de prester leur main pour l'execution d'une maluersation criminelle, leur en donne ses ordres par escrit. Par le moyen de ses ordres, ils pretendent ne pouuoir estre recherchez. C'est leur vnique refuge. Cependant ils disent les auoir bruslez, & ils auront eu la negligence de ne pas conseruer des pieces si precieuses.

On peut mieux dire qu'ils ont eu le soin & la preuoyance de les supprimer, le sens commun & la raison naturelle y resistent, & il n'y a rien de vray semblable en cette proposition, rien qui ne choque toutes les apparences, *falsa confessiones naturalibus conue-*

nire debent, dit le Declamateur. Quand on articule vn fait pour sa defense, il doit estre appuyé de quelque circonstance probable, autrement il se destruit soy-mesme.

Les Tresoriers de l'Espargne ont allegué que les ordres pour reformer les billets estoient écrits au bas de chaque billet, & que ces billets qui leur estoient rapportez, ont deu estre supprimez, & n'ont pas estimé qu'il fust d'aucune necessité de les conseruer. Mais cette remarque est entierement à leur confusion. Car quand on rapporte vn billet au Tresorier de l'Espargne, il est vray qu'il doit biffer sa signature, & en mesme temps rayer sur son registre l'article dans lequel il est fait mention de l'expedition du billet: Mais comme ces registres sont fort pressez, & que par mégarde on pourroit rayer vn article pour l'autre, comme cela arriue souuent, il est absolument necessaire que les Tresoriers de l'Espargne gardent soigneusement tous les billets qui leur sont rapportez, afin de les voir lors qu'ils dressent leur estat au vray, & qu'ils puissent verifier toutes les radiations & les apostilles mises sur chaque article de leur registre, autrement ils feroient tous les jours en peril ou de se charger doublement, ou de faire quelque obmission de recepte. Cependant il est vray que les Tresoriers de l'Espargne n'ont pas fait seuls tous les changemens de billets, dont ils peuuent estre accusez. Il est certain que les Sur-Intendans ont donné des ordres de reassigner de mauuais billets; & il est encore plus constant que ces ordres sont entre les mains des Tresoriers de l'Espargne, qui n'ont pas pû ny dû s'en deffaire, puisque c'est leur justification. Et s'ils affectent de les cacher par vne reticence malicieuse, il n'est pas mal-ayse de penetrer le secret ou de descouurir le motif de cette conduite.

Les Tresoriers de l'Espargne ayans veu en ces derniers temps qu'on ne tenoit aucun ordre dans l'administration des Finances, & que les reuenus de l'Estat estoient abandonnez au pillage, ils ont voulu prendre leur part du butin, & se sont donnez la licence de reformer d'eux-mesmes, & de leur chef des billets. Ce qu'ils ont fait avec d'autant plus de facilité, que la reformation dependant de leurs mains, personne ne les en pouuoit empescher que les Sur-Intendans. Mais comme les Tresoriers de l'Espargne, ont eu connoissance qu'ils ne tenoient aucun registre; Que d'ailleurs commettans eux-mesmes le mesme crime, ils n'auoient
garde

garde de le condamner, ils en ont reformé de leur autorité. Ainsi ce desordre & cette maluersation ont esté pratiquez par les Ordonnateurs & les Tresoriers de l'Espagne; mais les derniers sont en cela d'autant plus coupables, que tout le crime a esté fait par leur ministere, & les vols sur leurs billets & quittances, pour couvrir leur faute, & pour empescher qu'on ne connoisse jusques à quelle concurrence ils ont profité dans ces reformatations: ce qui se verroit clairement si l'on rapportoit les ordres qui leur en ont esté donnez. Dans le dessein d'obscurcir la verité, ils se chargent de tout le vol qui a esté commis, & ils détournent la preuue qu'ils ont entre leurs mains, & qui pourroit seruir à la conuiction de leurs complices.

Mais on trouuera ces raisons beaucoup plus fortes, si on considere en second lieu, que le crime n'est pas seulement en la suppression, mais qu'il est dans les billets mesmes; & dans tous les déguisemens qui y ont esté apportez: Car comment peut-on excuser des billets renouellez & reassignez pour des differences de fonds des Traitez reuoquez, & des interets de prests imaginaires & supposez, de vieux billets, & pour des sommes si effroyables?

Toute l'excuse des Tresoriers de l'Espagne est de dire, qu'il n'y a point de difference entre les billets, non plus qu'entre la monnoye. Cette comparaison n'est pas impropre en vn sens, parce que les faux billets ne sont point moins criminels que la fausse monnoye. Mais si les Tresoriers de l'Espagne, n'ont pas voulu faire le discernement des faux & des veritables billets, c'est en cela qu'est leur faute, parce que toutes & quantefois qu'ils ont donné des billets, ils ont deu, & ç'a esté la moindre fidelité qu'ils ayent esté obligez de conseruer au Roy, de faire la distinction des billets qu'ils ont donné pour des remises, pour des differences de fonds, ou pour des interets; afin que si les Traitez n'auoient point de lieu, si les alienations n'estoient executées, & si les prests n'estoient point faits, ils ne changeassent point leurs billets; & ainsi ils peussent empescher que le Roy ne fust point volé. S'ils ne l'ont pas fait, ils ont peché volontairement, & ont bien voulu que le Roy fust trompé. Il estoit fort aisé de connoistre si les billets estoient bons ou mauuais, estant certain que l'on ne peut changer ou reformer vn billet procedant d'vne Ordon-

nance de comptant, pour remise d'un Traité sur un autre fonds que celui du Traité; ou pour une Ordonnance de difference de fonds, sur un autre fond. que celui de la constitution. Puisque ces descharges ne sont expédiées que pour consommer les fonds qui y sont contenus, tous les changemens qui en sont faits sont criminels & punissables.

Et quand au lieu de renouveler un billet sur la même année, sur laquelle il a été expédié, on le fait par remise à une autre Espargne, les deux Tresoriers sont coupables. Et celui qui pour une mauvaise despenſe expedie sa quittance à la descharge de son confrere, comme ayant reçu de luy de l'argent comptant, & celui qui sans s'enquerir quelle est l'origine de cette quittance, donne ses rescriptions sur les Fermiers du Roy: Et tant s'en faut que les Ordonnances appellées de remises, par lesquelles l'on dit qu'un Tresorier de l'Espargne remettra une certaine somme es mains de son confrere, pour l'employer ainsi qu'il luy sera ordonné, puissent tenir lieu d'ordre de reassignation au Tresorier de l'Espargne, & couvrir sa maluerſation, qu'au contraire elles seruent encore à sa conuiction. Premièrement, parce qu'on a pû abuser de ces Ordonnances, en les appliquant à un usage different de celui auquel elles estoient destinées; Qu'il y en a beaucoup dont les sommes sont raturées, & notablement augmentées; & on ne doute pas que les Tresoriers de l'Espargne n'ayent eu ordre de reformer une partie des billets qu'ils ont reassignez; mais on se plaint de ce qu'ils cachent ces desordres par une suppression malicieuse; & l'on souteint qu'il n'y a point d'autre raison de cette reticence, sinon parce qu'ils en ont reassigné plusieurs de leur chef, & sans ordre.

Et quand dans un des Registres du sieur Jeannin l'on void des ratures grossieres & affectées; Quand on void le nom de Duval au lieu de celui de Blaise Chirol, par une fausseté toute sanglante, & qui porte le crime bien au delà d'une simple maluerſation, & du larcin; Quand on void qu'au lieu de suivre les ordres mêmes de ce nouveau desordre, il a baillé trente-six billets au lieu d'une seule quittance qu'il devoit fournir. Qu'il les a coupez en plusieurs autres, qui est une licence que les Tresoriers de l'Espargne se sont donnée pour en abuser une infinité de fois; Qui est-ce qui peut douter de tout le secret de cette magie noire

pour commettre tant de choses si effroyables & si prodigieuses?

Car enfin il est mal-aisé de comprendre de quelle façon les Tresoriers de l'Espagne se pretendent excuser dans l'estat auquel ils veulent que les choses soient reduites; car ils pretendent d'un costé que de ce grand larcin manifeste & confessé ils sont innocens, parce qu'ils ont esté obligez d'obeir au Sur-Intendant. Qu'ils ont veu un Secretaire du Conseil entouyé en prison pour auoir resisté, Qu'ils ont eu raison de craindre la mesme chose; & que leur innocence n'a point besoin d'autre iustification, sinon *habuit parere necesse*, & d'autre costé ils ne rapportent point d'Ordonnances dudit Sur-Intendant; ils pretendent les auoir bruslées: & dans des circonstances si criminelles, ils veulent qu'on suiue leur foy & leur tesmoignage seul pour leur iustification.

L'opinion la plus aduantageuse qu'on en pourroit conceuoir, seroit que l'on creust qu'ils se sacrifiasent volontairement, pour ne point charger M^r Foucquet. Mais que cette charité est fort rare, & il n'y a guerres de personnes dans ce siecle & de cette condition, qui disent par amitié: *Me me, adsum qui feci*; Et d'ailleurs M^r Foucquet n'en seroit pas plus justifié, parce que, quoy que tout ne soit pas fait par ses ordres & pour ses interets, il est constant que la plus grande partie a esté faite avec sa participation, & le plus ou le moins dans le particulier ne le rendra pas plus innocent ou plus coupable. Mais il est bien aisé de connoistre que les Tresoriers de l'Espagne n'ont point manqué de prendre dans tout ce commerce, toute la part & tout l'aduantage que donne d'ordinaire la complicité. S'ils s'estoient contentez de prendre des auantages honnestes & innocens, que leur pouuoit donner vne administration fidele, ils n'auroient pas fait des fortunes si grandes & si prodigieuses, apres des despeses & des profusions si horribles, & ils n'auroient eu garde de prester la main à ce commerce prodigieux, & de s'engager dans un secret si criminel, s'ils ne l'auroient cherement vendu. S'ils n'y auoient esté beaucoup interez; s'ils n'auroient crainct qu'en denonçant les autres on les dénonceroit eux-mesmes, il y a long-temps qu'ils auroient fait voir au Roy la verité de cette meschante conduite, & déuillé tous ces mysteres d'iniquité. Mais comme il ne faut point douter que la preuue de tout ce qui s'est passé, ne soit entre les mains de M^r Foucquet &

de ses Commis, aussi bien que chez les Tresoriers de l'Espargne; & que si les vns & les autres ont si fort affecté de le cacher, c'est qu'ils sont tous dans le mesme engagement, & de mesme condition.

Car quant à ce que l'on pretend qu'ils ne se sont pû dispenser de suiure l'ordre & les commandemens du Sur-Intendant, auquel ils ont dû vne obeïssance au eugle, & parere necessé, c'est pour des personnes de cette condition l'excuse la plus absurde qui puisse jamais estre proposée. Car dans les actions indifferentes, ou dans les fautes legeres, le commandement d'une personne Superieure, peut bien seruir d'excuse, & diminuer la faute. La puissance d'un pere sur un fils; d'un maistre sur un esclau estoit infiniment plus grande dans la jurisprudence Romaine, que ne peuuent estre parmy nous toutes les puissances superieures, puis qu'ils auoient droit de la vie & de la mort; & la loy *Seruus non in omnibus. ff. de obligat. & actionibus*. Dans la loy 4. *De postulando*. La loy *Si tacitum ad leg. Falcidiam*. La loy 11. §. *Si tutor. ff. quod vianit clam*. La loy *Diuus*. La loy *Filius ad leg. Corneliā de falsis*, ny le fils, ny l'esclau ne sont point excusés quand ils commettent un crime, parce qu'il n'y a point de puissance qui puisse forcer: & comme dit M^r Cujas, *habetur qui libet pro libero, nec parere cogitur qui compellatur ad facinus, flagitium, obscenitatem, & debet se gerere pro homine sui juris sueque potestatis*.

Monsieur d'Argentré sur l'art. 146. de la Coustume de Bretagne, qui est conceu en ces termes, *En delict & forfait, n'y a garand*, passe encore plus auant: car encore que l'autorité du Magistrat qui est l'Interprete des Loix, semble pouuoir rendre tout ce qu'il ordonne legitime, neantmoins il n'en fait point de distinction: *Iubenti delictum nemo parere cogitur; non seruus domino; non filius patri; non quisquam magistratui, in his que per se delicta sunt; & non ideo minus crimine tenetur qui dicit huiusmodi facti se mandatorem habuisse*.

Et si dans un temps où les serfs estoient exposez à la violence des Maistres, aux chaines, aux fers & à la mort mesme, dans vne Republique, où c'estoit un crime d'Estat de desobeir au Magistrat, & de vaincre contre l'ordre du Capitaine; combien cela doit-il estre plus indubitable parmy des personnes libres sur lesquelles il ne reste plus que des puissances justes, & toutes soumises à l'autorité du Prince des Loix; & on a par consequent la liberté toute entiere de refuser les choses qui ne sont pas legitimes, particulièrement à l'égard des Tresoriers de l'Espargne, qui estoient

journallement en lieu, en pouuoir, & en estat de se plaindre au Roy, ou au Conseil.

Il n'est pas necessaire de confirmer par les exemples, des veritez si certaines. Il ne faut que parcourir tous les crimes pour en trouuer la preuue dès la premiere proposition. Dans l'homicide, l'assassin n'est-il pas autant, & souuent plus coupable, que celuy qui l'a engagé. Dans les faussetez, le Greffier aussi bien que le Iuge. Dans les benefices, celuy qui prepare le poison, autant que celuy qui le commande. Dans les accusations calomnieuses, les faux tesmoins qui sont les ministres des accusations sont bien souuent autant & plus punis que les accusateurs. Dans les recelez, les pillages & les larcins, fait-on difference entre ceux qui les ont ordonnez, ceux qui les ont faits & ceux qui les ont recelez.

Quand les Tresoriers de l'Espagne n'auroient eu que la raison seule, le sens commun, & la conscience pour se defendre, rien ne les pouuoit excuser de la fidelité qu'ils doiuent au Roy, qui est infiniment au dessus de toutes sortes de devoirs, & de leur honneur propre, qui deuoit estre au dessus de toute sorte de respect; Mais ayans pour eux les Ordonnances anciennes & nouuelles, l'usage & les Arrests, s'ils ont donné leurs mains au desordre, qui a rompu toutes ces digues, & causé le debordement de cette licence effrenée, il n'y a rien qu'ils puisse justifier & enuers le Roy & enuers le public, d'auoir souffert que de leur nom, de leur feing, de leur entremise, on composast de si importantes maluersations. Ils ont bien dû sçauoir qu'ils ne sont pas des instrumens inanimez, & des conditions seruiles, & ce qu'on ne pardonneroit pas à vn simple domestique, dans vn larcin fort mediocre, on ne le peut pardonner à des personnes qui auoient de si grandes obligations à la Iustice, & à la bonne foy; & qui ne pouuoient jamais pis faire que ce qu'ils ont fait pour faciliter, pour ayder & pour couvrir tous les larcins & tous les crimes, qui ont esté commis dans les Finances du Roy.

Mais sans s'attacher à examiner curieusement toutes ces formalitez & scrupules des Finances, ces termes d'assignation, de reassignation, d'Ordonnances de comptant, & de remises.

Il est certain que pendant les années 1656. 1657. & 1658. il a esté volé au Roy plus de soixante millions. Il est également constant & certain que de ces sommes immenses & prodigieuses les

Tresoriers de l'Espargne en sont chargez, puisqu'ils ont confessé par escrit les auoir receuës. Cependant ils n'ont pas ces deniers entre leurs mains, & ils ne les ont pas employez au payement des despeses de l'Estat. Et quand on les presse & qu'on leur demande compte & raison de cette mauuaise administration, & qu'on leur dit qu'une Ordonnance de six millions de difference de fonds, d'une constitution qui n'a jamais esté faite, est vne faulxe despenze: & qu'une infinité d'autres Ordonnances de pareilles natures, pour remises de Traitez non executez, d'interests de prests supposez, & vieux billets reformez, ne sont pas de meilleur aloys; ils l'auoient, & comme ils ne peuuent ny justifier ny excuser ce desordre, ils sont les premiers à le condamner. Ils l'auoient, mais ils disent qu'ils n'ont rien fait qui leur puisse estre imputé, parce qu'ils ont obey aux ordres de leurs Superieurs.

Quand en suite, sans approuuer cette excuse, l'on insiste sur la representation de ces desordres, ils leur sont eschappez, & se sont esuanoüis entre leurs mains. On les interpelle de declarer qui sont ceux qui ont profité de cette dissipation, & à qui ils ont deliuré leurs billets, ils demeurent muets, & se rapportent à leurs Registres. On les examine bien souuent, personne n'est cotté. D'autres fois les cottes sont raturées avec telle application, que l'on n'en peut plus rien lire. Et quand ils s'en trouue quelqu'une entiere, ceux qui sont ainsi nommez desauoient, & soustiennent que n'ayans point signé les Registres des Tresoriers de l'Espargne, ils ne peuuent faire de foy contr'eux, & le Tresorier de l'Espargne, au lieu de soutenir la foy de ses Registres, declare que les noms qui y sont inserrez, y ont esté mis à l'aduanture, & sur des rapports & des relations incertaines. Ainsi le Roy a esté volé, la France exposée au pillage, & nous n'auons d'auteur certain du vol, que le Tresorier de l'Espargne qui a receu l'argent, & lequel, si nous l'en voulons croire, est demeuré comme vne statuë immobile, & qui sans aucun ordre, qui paroisse, a ouuert le coffre de l'Espargne à tous ceux qui se sont presentez, pour dissiper les deniers publics, sans examiner le titre de leur creance, & sans mesme les connoistre. Apres cela si les Tresoriers de l'Espargne ne sont coupables du crime de peculat, il faut effacer toutes les loix & les Ordonnances, couronner la licence, bannir toute esperance de reformation, & establis pour maxime, que l'on ne punit jamais que les foibles & les

misérables; & que ceux qui ont des alliances puissantes, des amis & des protecteurs, eschappent par leur credit à la censure de la Loy, & à la rigueur de la Justice.

C'est pourquoy il est tantost temps que la Chambre commence à condamner le crime dans son principe & dans son excez. Ce qu'elle a fait jusques à present dans la reduction des rentes, c'est vne Justice signalée qu'elle a renduë au Roy pour sa décharge, & sa liberation & la condition de ceux qui s'y sont trouvez engagez; la bonne foy, le mauuais vsage, & l'autorité mesme de l'Ordonnateur ne les a point excusé; mais c'est pour les maluersations des Officiers que la Chambre est principalement establie. C'est pour faire rendre au Roy les choses qui luy ont esté mal prises. C'est pour establir de bonnes & de saintes Regles pour l'administration des Finances, qui ne seront jamais plus fortes, que quand elles seront affermies par la punition du passé, sans laquelle toutes les Loix sont mesprisées. L'euidence de la faute, la grandeur des sommes, la Justice que l'on doit au Roy, la confiance qu'il a eüe en ses principaux Officiers qui en ont abusé, sont des motifs assez puissans. Mais s'il en falloit adjouster quelques autres, la compassion du peuple, le reflux necessaire qu'a fait cette depredation sur les calamitez publiques, demandent vne satisfaction toute pleine, & au moins vne reparation suffisante, pour produire vn soulagement notable à toutes les miseres que ces desordres ont causé.

Et que donnant à l'administration des Finances & de l'Estat vne forme toute nouuelle, digne de l'application qu'y donne nostre Grand & incomparable Monarque, l'on reestablisce pour jamais l'innocence & l'honnesteté; la prudence & la frugalité, qui sont les plus seures nourrices de la Vertu. Faire reuiure parmy les Iuges, l'integrité des-interestée, & l'application aux Sciences; La fidelité parmy les Grands & les gens de guerre, sans esperer de bien-faits que de leur Souuerain; Exterminer pour jamais l'intrigue, la caballe, & le partage des attachemens de la Cour, avec ceux qui n'ont le bien du Roy sous leur administration, que pour le bien mesnager & employer à bon vsage: Et inspirer enfin cette belle maxime dans tous les esprits, Que sous le Regne d'un si grand Monarque, que le nostre, la Vertu sera la seule route qui conduira à la Fortune, & qu'il n'y a point d'autres voyes pour y paruenir.

Extrait des Registres de la Chambre de Justice.

SUR ce qui a esté représenté en la Chambre par le Procureur General du Roy en icelle, que pour prévenir les abus qui pouroient estre commis en l'impression des Lettres patentes, Arrests & autres Expéditions concernant ladite Chambre, il est nécessaire de faire choix & de commettre un Imprimeur de capacité & probité reconnu. **LADITE CHAMBRE** a ordonné & ordonne, que toutes les Lettres patentes, Declarations, Arrests & autres Actes & Expéditions concernant ladite Chambre, seront imprimées par Antoine Vitre Imprimeur du Roy. A fait défenses à tous autres Imprimeurs, Libraires & autres, d'imprimer aucuns Arrests & Expéditions de ladite Chambre, à peine de quinze cens liures d'amende contre chacun des contrevenans, applicable à l'Hôpital general, & d'autres peines au cas échéant. Fait en la Chambre de Justice, tenuë à Paris le 9. iour de Decembre 1661. Signé, FOVLCAULT.

